

20. Defensor ille neminem vinctum tenebat, quem præ lætitia ob filium natum liberare potuisset; ipse solummodo liberatus est eo vinculo, quod debitum erga Manes appellatur.

21. “Ad finem *Vedarum* usque ibit filius meus, atque in prælio usque ad “finem hostium!” Ita cogitans rex, significationum gnarus, filium suum *RAGHUEM* appellavit, radicis *eundi* significationem respiciens.

22. Cepit ille in diem pulchrorum membrorum incrementum, cura patris, omni felicitate præditi; sicut recens luna, solis radiis in ejus orbe progredientibus.

23. Sicut *UMA* atque *SIVAS* e *KÁRTIKEYA*, sicut *SACHIS* atque *INDRAS* e *JAYANTA*, sic rex atque uxor ejus *Magadhensis* ex hoc filio gaudium ceperunt, similes e simili.

24. Ut *rathágarum* avium, sic eorum amor mutuus, animos conjungens, quamquam ab unico eorum filio divisus, tamen mutuo augebatur.

25. Puer, cum vocem a nutrice primo dictam pronuntiaret, ejusdemque manibus sustentatus incederet, atque salutare edoctus corpus inclinaret, patris gaudium auxit.

26. Rex, gremio excipiens eum, qui voluptate, e corporis contactu orta, nectare quasi cutem conspersit, oculos in angulis comprimens, tandem aliquando filium tangendi dulcedinem expertus est.

27. Putavitque ille, fines haud transgrediens, hoc filio nobili stirpem suam stabilitam, sicut *BRAHMAN*, hominum dominus, creationem suam per *VISHNUEM*, utpote eam suimet ipsius partem, quæ in prima qualitate versatur.

28. Simulac ille tonsuram subierat, una cum ministrorum filiis amicis, qui jam comam prolixam alebant, per aptam elementorum cognitionem, veluti per fluvii os, exiit in mare verborum.

29. Tum illum, sacro filo rite cinctum, patri carum, præceptores docti instruxerunt; neque opera eorum in hoc puero inanis fuit: nam quævis cura, in rem idoneam collata, prospere cedit.

30. Nobili intellectu præditus, omnium intellectus virtutum ope deinceps trajecit quatuor scientias, quatuor oceanis similes; veluti sol, plagarum dominus, plagas transcurrit equis, ventum velocitate superantibus